

**Diskour Lon. Mm. Leela Devi Dookun-Luchoomun, vis Premier Minis ek Minis Ledikasion, Ledikasion Tersier, Sians ek Teknolozi pou lansman « Rapor Lortograf Kreol Repiblik Moris : enn bilan lor lekritir kreol dan Repiblik Moris » dan Henessy Park, zedi 23 me 2024**

**Ag. SCE. Minister Ledikasion, ledikasion tersier, sians ek teknolozi Prezidan ek mamb, Akademi Kreol Repiblik Moris**

**Secretaires Permanents;**

**Ser invite**

**Madam, Misie**

**Mersi pou zot prezans zordi.**

Lane dernier an 2023, premie fwa finn ena lexame Kreol Morisien dan « **National School Certificate** » pou Grad 11 (ex Form 5). Sa lexame-la, li ti antierman prepare, organize ek korize par bann Morisien dan Moris sou kontrol « **National Examinations Board** ». Mo sir nou tou pou dakor ki nou finn bien progrese mem si ena ankor travay pou fer.

Avan nou kontinie, li importan ki nou fer enn bilan ek nou dir mersi tou bann dimounn ki finn travay ek pe travay pou ki langaz Kreol progrese, pa zis dan nou Repiblik, me osi dan losean indien ek dan lemond :

Dabor, nou bizin rekonet progre ki Kreol Morisien finn fer depi so lorizinn ziska zordi. Nou rekonet travay ki bann pionie inn fer. Mo ena enn panse spesial pou Dev Virasawmy ki finn kit nou resaman.

Nou rekonet osi travay Profeser Vinesh Hookoomsing ki ti fer propozision pou larmonizasion lekritir kreol dan so Rapor Grafi-Larmoni. Profeser Hookoomsing ti osi premie Prezidan Akademi Kreol Morisien ki ti travay lor premier edision Lortograf Kreol Morisien ek Gramer Kreol Morisien.

Depi sa, travay lor kreol Morisien inn akselere. MIE finn kree enn Kreol Unit, finn finaliz Kourikoulum, liv pou bann klas, formasion profeser ek lintrodiksyon Kreol Morisien dan lekol.

Travay pa arete. Akademi Kreol Repiblik Moris avek Liniversite Moris pe ofer kour Kreol Morisien pou tou dimounn ki anvi aprann lir ek ekrir Kreol Morisien dan so lortograf ofisiel.

An 2019, nou finn re-aktializ Akademi Kreol Morisien. Nou ti anvi travay dan enn manier inklizif lor Kreol Rodrig ek bann lezot teritwar nou Repiblik. Nou finn kree Akademi Kreol Repiblik Moris avek bann nouvo « **Terms of Reference** » pli elarzi.

Depi 2020, Kreol Rodrig inn fini rant dan lekol dan Rodrig.

Depi lane dernier, gouvèrnman finn introdwiw **“National Examinations Board”** sou lezid liniversite Moris, avek kontribision MIE ek MES. **“National Examinations Board”** finn travay lor lexamen Kreol Morisien pou **“National School Certificate”** ek pe travay lor lexamen pou bann kalifikasion teknik.

### **Madam, Misie**

Tousala reprezant enn evolision istorik dan peisaz ledikasion dan Repiblik Moris. Nou tou bizin fier ek kontign travay pou ki ledikasion permet nou pei progrese sosialman, kiltirelman ek ekonomikman.

Madam, Misie

Zordi, mo ena plezir ek privez pou lans enn dokiman Akademi Kreol Repiblik Moris ki zot finn apel: **“Rapor Lortograf Kreol Repiblik Moris: enn bilan lor lekritir kreol dan Repiblik Moris.”**

Kouma bann intervenan avan mwa inn dir, sa dokiman-la li ena trwa parti:

- Premierman, enn rekapitilatif lor bann gran dat ki finn mark listwar lekritir Kreol dan Repiblik Moris. Zordi, apre ki Kreol Morisien finn ariv ziska Grad 11 (ansien Form 5), li enn moman ideal pou fer enn bilan lor bann avanse ki finn ena konsernan sa langaz-la ziska zordi.
- Dezieman, enn reletir premie Rapor Lortograf Kreol Morisien avek enn bilan ki sey, otan ki posib, konsider bann komanter, remark, propozision ki bann dimounn ki finn inplike dan lansegman, aprantisaz ek lekritir finn soumet ek bann spesifisite Kreol Rodrig.

- Trwazieman, enn ti bilan lor linpakt lortograf ofisiel Kreol Morisien lor plan akademik, institisionel, mediatik ek piblisiter.

### **Madam, Misie**

Akademi Kreol Repiblik Moris, sou lezid mo Minister, finn kree pou li kontinie developman lortograf, gramer ek vokabiler lang kreol dan nou Repiblik ek fer promosion sa lang-la dan tou bann sekter: siantifik, ekonomik, legal e sosyal. Governman pe donn tou bann moyen neserer pou ki tou dimounn aprann lir ek ekrir kreol Morisien dan so lortograf ofisiel. MIE ek Liniversite Moris finn osi travay avek Rodrig lor Kreol Rodrig.

Boukou travay finn fer pou striktir Kreol Morisien. Kreol Morisien, se enn lang vivant. Kouma tou lang, li natirelman develope an permanans. Akademi Kreol Repiblik Moris pou rest garan lortograf, gramer ek vokabiler Kreol dan nou Repiblik.

Sa bilan-la, se enn pa dan bon direksion. Nou bizin kontigne.

### **Madam, Misie**

Mwa mo premie pou oule ki nou al ankor pli lwin. Nou bizin kapav ena enn **critical mass** resours imenn kalifie, fer plis letid, prodwir plis resours literer an Kreol Morisien pou nou kapav internasionaliz nou mouvman. Mo ankouraz Akademi Kreol repiblik Moris avek MIE, MES ek Liniversite Moris pou travay lor bann implikasyon pou nou kapav al pli vit, pli lwin.

Mo panse ki nou lor bon sime ek ansam, nou pou develop kreol Morisien ankor plis.

### **Madam, Misie**

Nou Morisien, nou ena enn lespri apartenans ek nou viv bien ansam kouma enn nasyon. Solidarite ki nou demontre rekonet partou. Leadership Premie Minis e disiplinn bann morisien osi rekonet. E mo pena dout ki, ansam nou pou kone kouma fer fas sak **challenge**, sak defi ki divan nou.

Kreol Morisien form parti bann eleman inifikater pli for dan nou pei e li nou devwar ek devwar sak sitoyen donn li so vre valer, valoriz li. Kreol Morisien klerman, li enn facter extrememan inportan dan nou Nation Building.

Leta pou donn tou bann resours ki bizin e pou zwe so rol kouma bizin pou promouvwar nou lang.

**Madam, Misie**

Avan mo termine, mo bizin dir mersi tou dimounn ki pe travay pou progre Repiblik Moris

Mersi.